

清史列傳

冊
五



清史列傳 卷三十八

大臣傳續編三

賀長齡

賀長齡湖南善化縣人嘉慶十三年進士改翰林院名以御史用二十五年十一月充廣西鄉試副考官十七年大考二等二十一年放山西學政二十四年十二月充文淵閣校理尋記名以御史用二十五年十一月充日講起居注官十二月升詹事府左春坊左贊善道光元年授江西南昌府知府二年陞山東兗沂曹濟道四年四月署山東按察使閏七月授廣西按察使九月調江蘇按察使五年陞江蘇布政使六年調山東布政使七年閏五月署山東巡撫六月兩江總督蔣攸銑奏來年新漕仍行海運上命沿海各督撫籌議長齡旋查明應行各章程具奏一在途各商船應催令回南受兌一最要島嶼令該管將弁親督彈壓一陸路委員應行酌減一收入津口船數日期應歸直隸奏報一收島船隻應相風催令開行上躋其言七月御史吳敬恆奏衍聖公官屬濫冒請嚴示限制上命長齡

確查具奏尋查明奏言嗣後保舉廟員三代年貌一併咨部俾無捏混恭遇覃恩惟咨部題補者得邀封典此外槩不准行仍令衍聖公隨時覆查不得以身家不清之人濫充從之八月奏拏獲假充王府差官之棍徒克昇額在東阿縣請託嚇詐請解京交部審辦九月奏臨清州揭獲逆帖一紙上命密查寫帖及張貼之人嚴拏究辦隨訪獲形迹可疑之臨清州人徐慶龍具奏上命將起意情由根究明確旋奏審明徐慶龍委係妄冀要功並無商謀滋事情節命再覆加嚴鞠按律定擬十月調江寧布政使因母年老奏請量移近省得旨所奏著不准行十二月諭曰吏部具題山東省大計卓異本內新城縣知縣容昺一員該撫賀長齡原註悃愾慈祥考語爲政之道總須寬猛相濟豈因一意慈祥遽爾列諸上考直省督撫當於屬吏中體用兼備者登諸薦牘固不可任武健嚴酷之吏爲害閭閻亦不可長優柔之習稍形廢弛十年十一月請開缺回籍養親旋丁母憂十三年服闋尋患病十五年病痊授福建布政使十六年調直隸布政使旋陞貴州巡撫三月入覲九月疏劾興義府知府谷善禾人地不宜定番州知州明玉精力衰頹請分別改簡勒休又平越州知州羅文寶延案不結請革職得旨所參是均允之十月請

將在部候補知府孔繼尹發往黔省差委諭曰孔繼尹前在山東官聲雖好然地方情形不同該撫何以知其於苗疆要缺相宜該省差委之員不妨照例請揀此端斷不可開所請著不准行並下部察議十七年三月會同雲貴總督伊里布奏請將石阡府改爲直隸廳所屬龍泉縣撥歸思南府管轄思南本係簡缺所轄婺川安化印江三縣號稱難治見將龍泉撥歸應將思南府改簡爲繁都勻府原係繁缺見在民苗馴服所屬易治請改繁爲簡又銅仁府屬平頭司吏目係屬閒員請裁汰定番州羅斛州判係苗疆要缺命盜詞訟近益繁多請將羅斛改設知縣部議以平頭司吏目無專辦公事准裁至石阡府羅斛州判均仍其舊九月奏湖北漢局存積白鉛六百餘萬斤足供數年銷售請暫停辦運以紓廠力又奏黔省歲運京鉛四起自己亥爲始歸併兩運以節經費允之十一月奏拏獲龍泉縣傳授報恩會匪犯曹得成呂相桂等審擬發遣如律十八年七月以奏夾帶小錢弊端輕聽新選銅仁府知府周作楫之言率行入奏得旨周作楫著交部議處賀長齡輕聽屬員亦屬冒昧交部察議十二月遵義府屬仁懷縣民人穆繼賢糾衆滋事與四川綦江縣接壤因勾結川省匪徒數百人欲赴川劫掠仁懷縣知縣王鼎

彝往捕綦江外委章泗明亦來查辦章泗明遇賊倉猝被害長齡偵知匪等於附近村莊裹脅愈多恐該處兵單漸致蔓延卽檄調弁兵圍拏隨殲斃賊黨十五名拏獲頭目謝世昌等五名又續獲賊匪二十餘人會同雲貴總督伊里布次第奏入諭曰匪徒糾集恣搶所供頭目十名均須按名弋獲卽就地正法被脅之人旣肯自首自應免罪有捉獲首犯來獻者亦不過貸其一死該督等所奏籲請加恩之處斷不可行並著咨會四川認真防堵旋會奏提督榮玉材與貴西道周廷授調兵分路進攻該處山口路狹匪等壘石樹柵一時不能摧破俟續調各路兵齊竭力進剿得旨催令未到各兵趕緊馳往攻剿迅速蕝事隨調到各營弁兵出隊前進殲賊匪二百餘人焚其巢燒斃之賊不計其數生擒三十餘名又獲男婦百餘人合計拏獲首夥各犯千餘名奏入得旨嘉獎十九年正月奏查禁耶岱普安清鎮各廳私種罌粟得旨嚴飭地方官認真查訪立予拔棄又奏續獲開館販煙各犯起獲煙土等件諭以查緝尙好總期有犯必除以絕此患勉之三月保奏降調知府周作楫留黔補用下部議鐫級四月奏拏獲天主教何枚等犯議罪如律又奏部選思南府知府谷善禾才難治劇請酌量另補六月奏訪獲吸食鴉片煙

之大定府經歷陳培玉請發往新疆效力贖罪得旨所辦好七月會奏貴平營都司馬鳴珂剋扣兵餉吸食鴉片並侵蝕銷造火藥銀兩請革職嚴審八月奏鎮寧州訓導蔣紹周捏詞妄傳查詢廣順州吏目丁申難保無挾制索詐情事請革職審辦十二月奏黔省不通舟楫民間絕少蓋藏見於無義倉處添辦先於省城糧儲道倉籌備實貯永寧羅斛等州報捐倉穀各一千二三百石其大定等處報捐倉穀二萬餘石一俟實數貯倉卽續行奏報二十年二月奏黔省土瘠民貧女紅不勤謀衣更艱於謀食見督同司道教民栽種木棉以冀漸知紡織玉屏縣栽種桑樹二萬餘株知縣王存成在署設局教以養蠶取絲婺川縣知縣陸文衡設局購木棉五百斤教人紡織民間能養蠶者百數十戶能紡織者百數十人庶漸推漸廣益宏聖主帡幪之化得旨實力勸導不可中輟勉之三月奏請都勻府八寨廳設立義學並加增學額下部議行經禮部奏稱向例添設學額督撫與學政會銜此次該學政並未列銜上命長齡明白專摺回奏六月奏稱繕摺時學政王慶雲出省考試是以未及會銜得旨賀長齡著交部議處又奏舉人饒懷清護庇吸食鴉片人犯致犯脫逃請革去舉人嚴審旋審明具奏得旨賀長齡所辦甚好一

律查緝不准疏懈二十一年八月審辦糾衆結盟匪徒汪擺片等四十一人如律
十一月奏挾嫌誣訐之學正熊文錦請從重發往新疆充當苦差先是御史花詠
春奏飭邊疆認真訓練上命各督撫妥議十二月長齡議稱黔省形勢四鎮分設
四隅撫提兩標居中控制布置最爲得宜貴東與古州鎮同城其鎮遠鎮亦該道
所轄貴西與威遠鎮同城其安義鎮亦該道所轄唯糧道不兼兵備請將糧道兼
兵備道銜所轄貴陽石阡等營責令稽查統於年內給報一次奏聞下部議行二
十二年三月戶部奏請敕力求撙節上命各督撫分別緩急通盤籌度長齡議請
將黔省通事土弁苗弁苗兵衝僻各路驛夫六項裁汰每年撙節銀一萬八百七
十餘兩並請將撫臣學政司道額支養廉銀每年捐出二成銀五千六百八十兩
州縣養廉銀每年捐出一成銀四千八百三十六兩俟經費充裕再爲復額疏入
如所請行十二月奏黔省辦運黑鉛酌停三年尙有盈餘請敕部議以節經費尋
經部臣議停四年從之又奏言貴州省城貯有關山威遠子母等銅礮平時並不
操演嗣後請定爲每年冬操演放一次多年鏽壞者改鑄擡礮以資利用得旨著
依議行至黔省跬步皆山所製擡礮自以輕捷便利爲要儻過於笨重運用不能

得力卽致有名無實二十三年五月奏永寧州撤任知州富呢雅杭阿公事未能明練得旨覈實辦理尋奏言察看該員才具短絀不知愧奮請以州同降補二十四年三月奏黔省安置各省流人及新疆改發人犯見有三千餘名恐地方官約束難周加以苗民錯處釁隙易生請將改發黔省者仍發新疆安插奉旨下部議奏旋經刑部議上復奉旨交軍機大臣會同刑部妥議敕下伊犁將軍辦理八月奏黔省擡礮製齊而火箭尤佐擡礮所不及數月以來製造均已如法眼同試放皆輕便適用得旨所造不爲無用其善練之十月奏遵義府屬稅口十九處子口十四處近年以來山徑紛歧稽查匪易擬將青坑稅口移於茅荅村其蘭坪等處子口一併裁汰庶走私可絕稅課自充二十五年正月會奏黔省下游鎮遠黎平都勻三府及古州廳所屬苗俗桀驁以盜爲生州縣差役緝捕難周擬於古州鎮遠兩鎮兵內挑選或十名或五名酌量地方衝僻令其專拏盜賊另挑數名作爲餘額遇缺卽補無事仍就本營操演不使曠廢責成旣專緝捕自倍臻周密得旨均下部議行四月陞雲貴總督請入覲旋因病賞假調理六月諭令毋庸來京卽赴新任俟三年屆期再行奏請七月奏請將黎平營參將張肇泰朗洞營參將存

住二員帶往滇省飭伍練兵報可八月兼署雲南巡撫十月永昌府回匪糾衆肆掠先將滋擾情形奏入諭長齡慎密籌辦又命激勵將士迅卽兜剿勿任滋蔓續奏稱回匪於保山縣猛庭寨聚集聲言報復見飭迤西道羅天池提臣王一鳳相機督辦尋奏言回匪千餘人由枯柯河大田壩等處衝突營盤已飛咨提臣張必祿添調官兵親往堵禦十一月又奏回匪逼近永昌郡先經迤西道羅天池將城中內應回民殲除淨盡匪等撲繞金雞村營盤經騰越鎮中軍遊擊朱曰恭帶兵迎敵將放槍之賊擊斃張必祿等分路進攻轟斃匪犯數十名匪等棄柵逃走查明回寨並無匪徒藏匿見將未到官兵截回歸伍有旨嘉之二十六年五月奏永昌逃散回匪經外來奸回煽惑糾衆復出提督張必祿總兵音德布等奮勇迎擊將賊首殲斃諭曰此次回匪滋鬧見據生擒之馬良一犯供稱上年九月搜戮內應殺人過多是以羣圖報復是羅天池辦理不善咎無可辭所有議敘著撤銷賀長齡著交部議處七月奏漢回搆隙情形得旨著賀長齡督率所屬嚴禁外來游匪以絕搆煽儻再有滋事唯賀長齡是問凜之八月奏軍犯王芝異奮勇敢誠請援回疆遣勇成例將其釋回諭曰賀長齡所奏甚屬謬妄內地與回疆情形迥不

相同在配軍犯自宜嚴加管束不得藉端遽請免罪致使妄生希冀該督總制兩省營伍不惟雲南之兵歸其統轄卽貴州各營亦無難隨時札調此次辦理么磨回匪何必藉一軍犯之力練勇相助耶賀長齡辦事毫無見識懦弱無能有負朕望著嚴行申飭交部議處經部議褫職上加恩改爲革職留任又諭曰上年雲南回匪滋事經賀長齡親往督剿辦理果協機宜何至本年復有蠢動見雖據奏稱連獲勝仗地方安謐惟究未能及早籌防優柔從事致復勞師糜餉已屬咎無可辭甚至總督重任兩省營伍皆其統轄豈竟調遣乏人轉藉一軍犯之力練勇助剿謬妄無能莫此爲甚賀長齡不勝總督之任著降補河南布政使十二月抵任二十七年二月患病回籍三月諭曰雲南漢回報復幾於無歲不有著李星沅悉心酌辦儻賀長齡從前辦理不善卽據實嚴參尋奏入得旨此次雲南回匪又復滋擾賀長齡未能詳愼區分率行掩捕又率准張富等投誠種種謬妄實屬辦理不善賀長齡著革職二十八年故

林則徐

林則徐福建侯官人嘉慶十六年進士改翰林院庶吉士十九年散館授編修二

十一年充江西鄉試副考官二十四年三月充會試同考官閏四月充雲南鄉試正考官二十五年二月轉江南道監察御史時河南儀封南岸工程未竣則徐以料販囤積居奇奏請飭地方大吏嚴密查封平價收買以濟工需下所司議行先是海盜張寶投誠後累官至副將至是復擢總兵則徐恐其驕蹇不可制疏劾之上達其言四月京察一等復帶領引見記名以道府用尋授浙江杭嘉湖道道光元年聞父病引疾歸二年授江蘇淮海道未赴任署浙江鹽運使三年遷江蘇按察使四年正月署布政使八月丁母憂五年奉旨赴河南督修隄土工竣仍回籍六年四月命署兩淮鹽政以疾辭十月服闋七年五月授陝西按察使署布政使旋陞江寧布政使十月丁父憂十年正月服闋六月授湖北布政使十一月調河南布政使十一年七月調江寧布政使時江蘇水災咨糴河南米麥則徐委員赴商邱劉家口及陳州光州採辦由河淮運達江境順道親往督辦並於淮揚一路勘災籌賑十月擢河東河道總督十二年正月疏言運河挑工已完六分惟沿隄出土之路因泥漿拋撒逐條凍積名曰泥龍尙未除淨日積日多挑運更爲費事一經春雨更恐衝入河心見飭工員挑完一段卽起淨一段泥龍其已挑未淨之

處官差夫頭量予懲責上是之二月擢江蘇巡撫未卽赴任三月奏言稽料爲河工第一弊端其門垛灘垛底廠及併垛戴帽各名目非抽拔拆視難知底裏見將南北十五廳各垛查明抗敝者察治並請裁山東泉河通判得旨向來河臣查驗料垛從未有如此認真者六月抵巡撫任疏言江蘇錢穀最爲繁重而漕務痼疾已深整頓錢漕先懲已甚清釐倉庫尤貴截流當執法者不敢以姑息啟玩心當設法者不敢以拘牽礙全局報聞時議裁汰冗員八月則徐偕兩江總督陶澍奏裁江寧鎮江二府照磨揚州府檢校華亭縣主簿金壇縣湖谿司巡檢又偕南河總督張井奏裁丹徒如皋二縣縣丞儀徵清江閘閘官均允行閏九月以南河盜決官隄首犯陳端日久未獲降五級留任先是則徐在江寧藩司任內以各屬水災建議倡捐煮賑資送留養收孩瘞棺捐衣勸糶養佃典牛借籽種禁燒鍋十二條經陶澍以聞至是事竣偕陶澍奏請獎勵捐輸出力各官紳允之十二月密陳藩臬道府考語疏言察吏莫先於自察必將各屬大小政務逐一求盡於心然後舉以驗屬員之盡心與否若大吏之心先未貫徹於此事之始終又何從察其情僞臣惟恃此不敢不盡之心事事與屬員求其實際謹將司道府之立心行事人

品官聲略具梗概以聞初則徐任按察使時奉旨綜辦三江水利以憂去任經陶澍奏明孟瀆劉河分年籌辦十四年孟瀆工竣六月則徐以劉河近日淤墊更甚奏請接行勘辦從之七月奏言江蘇錢漕倍於他省其中有緩有急有舊有新勢難一律清解與其漫無區別徒令剗肉補瘡莫若專嚴於提新而暫緩於補舊新款果能全解是州縣無新虧而舊欠亦可漸冀彌補得旨竭力爲之八月奏江蘇各沙洲前經召佃收租充水利經費惟其中有書院善堂公款及民戶承買之業請自道光八年新例以前報部有案者遵照舊案一律准買執業其未經報部及例後所報者發還原價概行歸公以示限制而杜效尤下部議行是年夏秋間江蘇各府或江湖盛漲廬畝被淹或暘雨愆期收成積歉九月蘇松等屬續遭風雨水棉穀粒均有受傷委員勘實奏請蠲賑格於廷議復上疏曰蘇松常鎮太倉四府一州錢漕最重道光三年水災以來歲無上稔民力益見拮据今歲秋禾節節受傷甚至發芽霉爛每畝比之上年少收五六斗民間積歉已久蓋藏本極空虛當此秋成之際糧價日昂來歲青黃未接不知更當何如小民口食無資而欲強其完納卽追呼敲撲亦有時而窮前此漕船缺米州縣尙能買補近且累中加累

不但無墊米之銀更恐無可買之米且鄰省亦連被偏災布匹絲紬銷售稀少權子母者無可牟之利任筋力者無可趁之工故此次雖係勘不成災而困苦情形實與全災無異覩此景象時時恐滋事端儻通盤籌畫有可暫紓民力之處總求恩出自上多寬一分追呼卽倍一分元氣疏入報可十一月以陳端就擒伏誅偕陶澍奏保出力人員十五年正月奏鎮江所屬丹徒丹陽運河爲江浙漕船要道見屆大挑之年請計段興工均允之十一月署兩江總督十六年二月回巡撫任七月復署兩江總督入覲十七年正月擢湖廣總督時荆襄歲苦水患則徐抵任後修築隄工躬自監視七月奏籌襄陽等屬鹽務緝私章程如所議行尋以江南河庫道李湘茝因庫款不清褫職則徐坐前任江蘇巡撫時註考不實降四級留任九月前任總督訥爾經額奏武岡州滋事首逆藍正樽已被鄉勇毆斃則徐遵旨研究亦以毆斃屬實覆奏上責其隨同附和遷就了事降五級留任十八年二月偕湖南巡撫錢寶琛奏籌辰沅道屬苗疆屯防各事宜下部議行又疏陳整頓鹽務略言貧民挑運售私其近川近粵近潞之處與兩淮場竈皆遠而鄰鹽一蹴卽至成本旣輕售價自賤且鄰省鹽課皆輕准綱獨重卽彼此同一官鹽亦必彼

盈此縮況以無課之私販紛紛侵灌其勢更不能相敵見在剴諭紳民日用飲食何在不可節省獨於食鹽計較貴賤犯法食私紳衿革功名平民受滿杖明利害者當不至如是之愚且湖廣錢漕最輕若鹽課復背官食私天良何在嗣後責成紳衿大戶及鄉團牌保互禁食私犯者公同送究其挑賣之窮民許改充肩販由官鹽店給票赴鄉賣完繳價再從前襄陽宜昌衡州三處奏明官運商鹽減價售賣以敵鄰私歷辦並無成效且一種奸販轉賣減價之賤鹽以灌旺銷之引地藉寇資盜無異剗肉補瘡應將此三處不令減價以杜流弊四月奏請湖南提督常駐辰州府扼要彈壓均允之閏四月湖南撫標右營遊擊馬辰失察家人及弁兵舞弊事覺則徐坐曾經保奏降四級留任九月奏各州縣水旱偏災奉恩旨膳黃祇能開載若干村莊其地名不能一一全敘難保吏胥無高下其手衿民亦或狡稱蠲免紛紛訐訟請將應蠲應緩應遞緩之頃畝細冊由各州縣另行繕榜隨同膳黃徧貼曉諭並責成該管道府稽察毋許隱匿上嘉其所見精細允行先是鴻臚寺卿黃爵滋疏請嚴禁鴉片以塞漏卮吸食者治以死罪命下中外各大臣議奏則徐奏言鴉片流毒已甚非難於革癮而難於革心欲革玩法之心安得不立

怵心之法況行法在一年以後議法在一年以前轉移之機正繫諸此必直省諸臣共矢一心極力輓回以期永絕澆風此法乃不爲贅設遂擬章程六條一收繳煙具以絕饞根一各省於定議後出示分一年爲四限遞加罪名以免觀望一加重開館興販及製造煙具罪名勒限自首以截其流一失察處分先嚴於所近一著令地保甲長查起煙土煙膏煙具庇匿者罪同正犯一豫講審斷之法以杜流弊因繕呈戒煙經驗藥方數種尋奏湖南湖北拏獲烟販並收繳煙土烟膏煙具情形上甚嘉之十一月入覲賜紫禁城騎馬命頒欽差大臣關防馳往廣東查辦海口事件水師咸歸節制十九年三月偕總督鄧廷楨等奏查辦躉船二十二隻起獲煙土二萬二百八十三箱請酌給茶葉大黃以示體恤得旨所辦可嘉之至該商畏罪自首情尚可原免其治罪酌賞之處著照所議則徐下部優敘四月奏英人夾帶鴉片請照化外有犯之例人卽正法貨物入官議一專條並酌予限期上命軍機大臣等議行新例既定則徐請先傳檄英吉利國王諭以利害擬臺呈覽頒發又遵查海口排練礮臺情形奏言廣東中路海口以虎門爲咽喉進口七里一山屹立海中曰橫檔其前有巨石曰飯籬排又其前小山曰下橫檔海道至

此分二支右多暗沙左以武山爲岸山下水深英船必由之路海面僅三百餘丈鎖以鐵練承以木排復建礮臺俯臨排練就令英船堅固衝斷鐵練尙有一層阻截羈絆多時臺礮乘之必成灰燼報聞時通商之國以十數俱遵具並無夾帶鴉片切結惟英吉利持兩端七月英領事義律率船五隻以索食爲名犯尖沙觜則徐檄參將賴恩爵禦之九龍山碎其雙桅大船英船紛集礮彈如雨我軍以網紗障船就旁施礮斃敵多名接仗踰五時英人死傷益衆逡巡遁八月復檄守備黃琮等偵英船於潭仔洋面乘英人方開礮亟擲火斗火罐焚其船敗走之義律因潛赴澳門倩他國人遞說帖求轉圜則徐以其言未可信奏請相機剿撫諭曰既有此番舉動若再示以柔弱則大不可朕不慮卿等孟浪但誠卿等畏蕙先威後德控制之良法也時御史步際桐奏謂責英出結徒開含混之路則徐覆言外人最重然諾彼愈不肯出結愈見其結之可靠亦愈不能不向其飭取臣不敢存趨易避難之見致負委任尋義律經則徐檄諭雖自稱悔罪稟請逐船搜查勒限驅回空臺仍觀望圖免具結九月復乘間糾兵船滋擾水師提督關天培敗之穿鼻洋遂竄泊尖沙觜則徐以其北有山梁曰官涌可以俯而攻也令深溝固壘以待